

Sporazum o raspodjeli carinskih prihoda

Ovaj sporazum je potpisan 1. decembra 2004. godine između:

1. Susan R. Johnson, zamjenika visokog predstavnika i supervizora za Brčko Distrikt Bosne i Hercegovine, Musala bb, 76 100 Brčko Distrikt Bosne i Hercegovine, kao prve strane,
2. Brčko Distrikta Bosne i Hercegovine, ovdje zastupanog po Branku Damjancu, gradonačelniku Brčko Distrikta Bosne i Hercegovine, Bulevar mira 1, 76 100 Brčko Distrikt Bosne i Hercegovine, kao druge strane,
3. Uprave za indirektno oporezivanje BiH – ITA - ovdje zastupane po Kemal Čauševiću, direktoru Uprave za indirektno oporezivanje, Banja Luka, Nikole Tesle 1, 78 000 Banja Luka, Bosna i Hercegovina, kao treće strane;

POŠTO

1. *Pozivajući se na* odredbe Konačne odluke donesene od strane Međunarodnog arbitražnog tribunala za Brčko 5. marta 1999., posebno stava 8 B Aneksa Konačne odluke od 18. avgusta 1999. koji određuje da supervizor ima vrhovna ovlaštenja nad budžetom Brčko Distrikta i prihodima prikupljenim u Distriktu kao i nad raspodjelom carinskih prihoda na način predviđen stavom 7 Aneksa;
2. *U skladu sa* članom III (1) (c) Ustava Bosne i Hercegovine koji određuje da su za carinsku politiku odgovorne zajedničke institucije Bosne i Hercegovine;
3. *Uzimajući u obzir* da se Zakon o carinskoj politici Bosne i Hercegovine i Zakon o carinskim tarifama Bosne i Hercegovine direktno primjenjuju na teritoriji Brčko Distrikta i da Bosna i Hercegovina predstavlja jedinstvenu carinsku oblast;
4. *Uzimajući u obzir takođe* Zakon o sistemu indirektnog oporezivanja u Bosni i Hercegovini ("Službeni list BiH", br. 44/03 od 31. decembra 2003.) kojim se uspostavlja institucionalna i organizaciona osnova za jedinstveni sistem indirektnog oporezivanja u Bosni i Hercegovini, doprinosi opštoj makroekonomskoj stabilnosti i fiskalnoj održivosti u cijeloj Bosni i Hercegovini, podržava funkcionisanje jedinstvenog ekonomskog prostora u Bosni i Hercegovini i predviđa uspostava Uprave za indirektno oporezivanje kao nezavisne administrativne organizacije koja je dužna da primjenjuje odredbe o indirektnom oporezivanju i politiku koju je definisalo Vijeće ministara na prijedlog Upravnog odbora;
5. *Sa stanovišta* prelaska sa postojeće strukture carinskih uprava u BiH na buduću ujedinjenu upravu koja će doprinijeti cjelovitoj makroekonomskoj stabilnosti i fiskalnoj održivosti u cijeloj Bosni i Hercegovini i sa ciljem omogućavanja osnivanja jedinstvene carinske uprave za BiH;

6. *S ciljem* jačanja saradnje i koordinacije između državnih institucija i Brčko Distrikta;
7. *Imajući u vidu* potrebu pravilne raspodjele sredstava prikupljenih po osnovu naplate carinske evidencijske takse od 1% prije 1. januara 2004. u svrhu kontinuiranih poboljšanja rada carinske službe u Brčko Distriktu;
8. *Nakon* konsultacija između strana u ovom sporazumu koje su okončane dogovorom o raspodjeli sredstava na doljenavedeni način

Ovim je DOGOVORENO sljedeće:

Član 1

Brčko Distrikt raspodjeljuje iznos od 7.253.814,12 miliona KM, iz prihoda prikupljenih naplatom carinske evidencijske takse od 1% prije 1. januara 2004., na sljedeći način:

1. 3 miliona KM za carinski terminal Brčko Distrikta, čija je gradnja već započeta;
2. 1.5 miliona KM za sufinansiranje puta od carinskog terminala na mostu Gunja-Brčko do carinskog terminala u luci Brčko;
3. 100.000 KM za renoviranje carinarnice na graničnom prelazu Brčko – Gunja;
4. 2 miliona KM u svrhu kupovine novih uniformi za carinike Uprave za indirektno oporezivanje, jedinstvenih u cijeloj BiH.


Član 2

Iznos od 653.814,12 KM ostaje u budžetu Brčko Distrikta za namjene/projekte Uprave za indirektno oporezivanje u Brčko Distriktu, po obostranoj saglasnosti direktora Uprave za indirektno oporezivanje i supervizora.

Član 3

Ovaj sporazum je sačinjen u šest (6) identičnih primjeraka na engleskom i jezicima BiH i svaka strana u Sporazumu zadržava dva (2) primjerka, po jedan od svake verzije. Engleska verzija Sporazuma je kontrolna za sve namjene.

Strane u Sporazumu su u znak potvrde gorenavedenog stavile svoje potpise na Sporazum ovdje navedenog dana i godine.



Branko Damjanac
gradonačelnik Brčko Distrikta BiH



Kemal Čaušević
direktor Uprave za indirektno oporezivanje Banja Luka



Susan R. Johnson
zamjenik visokog predstavnika
i supervizor za Brčko
